

## **BAB V**

### **KACINDEKAN JEUNG SARAN**

#### **5.1. Kacindekan**

Puisi pupujian di Kampung Ciodéng, Désa Andir, Kacamatan Balééndah, Kabupatén Bandung, dikumpulkeun ti pondok pasantréni Al-Harus. Pupujian nu kainventarisir aya 60 anu ngawengku: 2 muji kaagungan Pangéran, 1 solawat ka Rosul, 5 du'a jeung tobat ka Alloh, 1 ménta sapa'at ka Rosululloh, 15 pépéling, jeung 36 ajaran agama.

Tina populasi 60 pupujian, ditangtukeun 30 pupujian pikeun sampel panalungtikan dumasar warna papasinganana. Dina nangtukeun jumlah sampel dumasar warna papasingan pupujian, ogé teu leupas tina tinimbangan proporsionalna. Pupujian nu dianalisis téh ngawengku: 1 muji kaagungan Pangéran, 1 solawat ka Rosululloh, 2 du'a jeung tobat ka Alloh, 1 ménta sapa'at ka Rosululloh, 7 pépéling, jeung 18 ajaran agama.

Kacindekanana nya éta: (1) eusi puisi pupujian nya éta: 1) harti saujratna tina puisi pupujian téh ngawengku 30 *sense*, 2) rasa nu dikandung dina pupujian aya genep rasa nya éta: kasieun, kakeueung, kasedih, sumerah, pangresep, jeung netral, 3) nada nu dikandung aya tilu nya éta: lemes, ngajak, jeung ngadu'a, 4) itikad nu dikandung nya éta ngélingan jeung ngajak umat Islam sangkan rajin ibadah jeung milampah naon baé kalawan ngagunakeun

ajaran agama Islam anu aya dina Al-Qur'an jeung Hadis, (2) Purwakanti runtuyan pungkas teu salawasna ngawangun pola a-a-a-a, tapi aya ogé nu wangun polana a-a-b-b-, a-b-a-b, a-b-c-b, jst. Lian ti éta, aya deui purwakanti nu nyangkaruk dina éta pupujian nya éta: 7 maduswara, 1 cakraswara, 35 mindoan kawit, 411 mindoan wekas, 33 laras madya, jeung 2 margaluyu, (3) Wangun pupujian aya tilu rupa nya éta: 15 wangun sa'ir, 14 wangun kantétan opat, jeung 1 wangun kantétan lima, (4) Eusi nu dikandung dina pupujian luyu jeung judul dina téks, (5) basa nu digunakeun dina pupujian nya éta 24 pupujian anu ngagunakeun basa Sunda jeung 6 pupujian anu ngagunakeun basa campuran (basa Sunda jeung basa Arab).

## **5.2. Saran**

Sanggeus nganalisis puisi pupujian nu aya di Kampung Ciodéng, Désa Andir, Kacamatan Balééndah, Kabupatén Bandung, aya sababaraha hal nu ditepikeun minangka saran, pakait jeung panalungtikan nu geus dilakonan.

- 1) Puisi pupujian nu aya di Kampung Ciodéng, Désa Andir, Kacamatan Balééndah, Kabupatén Bandung, mangrupa salah sahiji karya sastra nu kudu diriksa, dijaga, jeung dimekarkeun ku urang salaku urang Sunda;
- 2) Puisi pupujian nu kakumpulkeun bisa dijadikeun bahan pangajaran dina widang sastra;
- 3) Ieu panalungtikan masih kénéh loba kakuranganana, ku kituna leuwih hadé upama aya panalungtik séjén anu nalungtik hal samodél kieu sarta eusina leuwih lengkep.

